



La Societad da musica Sedrun ha delectau in grond auditori cun bialas melodias.



Il Chor mischedau Sedrun ei sededicaus ad obras da cumponists romontschs contemporans.

Tujetsch ha cantau e sunau

Concert da Nadal dil Chor mischedau e dalla Societad da musica da Sedrun

DA PAUL DUFF / ANR

■ Per la sera da sogn Stiafen han las duas uniuns localas envidau ad in concert communabel. La baselgia ei s'emplenida sil davos plaz ed ils presents han retschert plascheivel cant e musica cun tempra da Nadal. Tut la Val ei en luna da fiasta. Era sche la cuntrada ei buc ennevada ei la tempra festiva derasada. Quei dattran las bialas decoraziuns perdetga ed en l'entira Val cloman ils zenns tier las devoziuns da fiasta. Nua che cristians seradunan resunan cants da legria, «Venite adoremus» e «Clara notg de Nadal», il himni mundial dil cumponist austriac Franz Xaver Gruber.

La canzun 117 el cudisch da canzuns da baselgia ha il cumponist Gruber cumponiu igl onn 1818. Il medem onn ha in

chor d'affons cantau la canzun per l'emprema gada da Nadal ella baselgia d'Oberndorf sper Salzburg. Il text haveva igl aussegner auxiliar Joseph Mohr scret en poesia dus onns avon. Grazia ad in restauratur d'orgla ei la canzun serepartida egl intschess dall'Austria e Germania e suenter sigl entir mund. Ella ei translada en sur 300 lungatgs, vegn menada el patrimoni cultural immaterial dall'Austria ed ei proponida da vegnir recepida sco patrimoni cultural mundial dall'Unesco. Igl onn 1905 vegn la canzun registrada l'emprema gada sin ina platta grammofonica. Adina puspei cumparan versiuns en novas registraziuns. Tala dil cantatur american Bing Crosby digl onn 1935 ei vendida sur 10 milliuns gadas. Buc in'otra ovra cuntegn aschi pregnont l'irradiaziun magica digl eveniment dalla sontga notg.

Cant e musica derasan plaschers

Il concert a Sedrun en baselgia da sogn Vigeli ha terminau cun la canzun melodiosa da Franz Xaver Gruber. La musica ha accumpignau igl auditori ed ils biars han buc aviert il cudisch da canzuns savend ordadora il text da tuttas treis strofas. Il concert dil chor mischedau ei staus dedicaus alla canzun romontscha. Per la pli gronda part ein las canzuns cumponidas dils cumponists contemporans Flavio Bundi, Gion Balzer Casanova, Carli Scherrer, Alvin Muoth e Claudio Simonet. En frestga presentaziun ei il chor passaus si. Tut sco usitau dallas cantaduras e dils cantadurs entuorn il dirigent Claudio Simonet. Las canzuns «Sera da stad, Notg d'atun e Levada dil sulegl» han tematisau intec il clima actual. Sco giavisch ni

supplica d'intercessiun enviars ils sogns ei la canzun «L'emprema neiv» resunada, cunzun en connex cun las suandontas obras «Canzun da sogn Vigeli» ed «Ex Voto». L'atmosfera da Nadal ei vegnida sutlingiada dallas canzuns «Neu a casa, Ave Maris Stella, O Sanctissima e Feglia Zion». Quellas obras ein creadas ni arranschadas per la gronda part da Claudio Simonet.

La Societad da musica Sedrun vegn dirigida da Lucas Decurtins. El ha elgiu bialas obras per sia formaziun concertanta. Denter autras ein melodias da Wolfgang Amadeus Mozart stadas d'udir. Igl arranschament da Jan de Haan ha tematisau obras ord concerts ed operas dil renomau cumponist classic. In'ulteriura biala produenziun ei stau il toc «A Christmas Pop Collection». Quei arranschament da Jan van

Kraeydonck cun canzuns da Nadal enconusentas ord la sparta da pop ha intirmau da cantar. Bugen havessen ils presents aunc tedlau enzacontas produenziuns da lur musicantas e musicants, ton spert ei quell'ura e mesa stada sparida. Las duas scolaras Anna-Lea Deragisch ed Alicia Beer ha fatg mingamai la punt denter las canzuns. En cuortas anecdotes han ellas raquintau ord la veta da famiglia. Maletgs e schabets sin la via enviars la fiasta da Nadal han ellas terminau cul giavisch «tuts che vegnessen perina ed havessen plascher da viver in cun l'auter». A quei giavisch ha bein igl entir auditori saviu s'accordar ed ins ei s'absentau cun bunns sentiments da cuntententscha enviars casa, ina flomma ch'il concert communabel ha envidau als presents.

Ina pintga pausa

Acziun spontana dalla Scola Vinavon a Glion

■ (cp) Cun ina pintga acziun han las scolaras ed ils scolars dalla Scola preprofessionala Vinavon dil Center da formaziun Surselva a Glion derasau gievgia vargada in tec atmosfera da Nadal. En treis differents loghens han els fatg in schinumnu «flashmob». Els ein serimnai a moda spontana ed han cantau la canzun dil schumbrader pign. Ils passants silla piazza dalla staziun ed ellas hallas d'entrada dil Migros e dil Coop a Glion han seschau divertir dalla cuorta produenziun e schizun survegniu regalau in tustget cun mams ch'ils scolars havevan fatg sez.

Entras quell'acziun han las scolaras ed ils scolars dalla Scola preprofessionala Vi-

navon vuliu luchenar empauet il temps da cumpra hectic avon Nadal. E quei ei era gartegiau ad els. Biaras persunas ein vegnidas plidentadas ed han seschau animar ad ina cuorta pausa cul schumbrader pign.

Per las scolaras ed ils scolars sez ei l'occurranza era stada ina buna variaziun tier l'instrucziun en scola. Las habilitads musicalas han saviu vegnir scurvidas da niev ed era reanimadas. Igl ei denton era stau ina reconuschienscha ed ina paga meritada per las stentas fatgas en scola: La gronda part dallas scolaras e dils scolars dalla Scola Vinavon han gia ussa perfranc saviu anflar ina piazza d'emprendissadi pil 2017.



Il schumber ei stau il signal da serimnar e cantar.



Il cant da scolaras e scolars ha attratg l'attenziun dils passants.



Scolaras han repartiut als passants mams fatgs sez.

■ DOMAT

Nov onns a la testa

(rrt) Beatrice Baselgia è dapi il 2007 presidenta communal da Domat. Uss sa ritira ella da la politica communal. Beatrice Baselgia è stada presidenta communal da Domat a partir da l'onn 2008 en fin l'onn 2016. Ils 31 da december 2016 è per ella l'ultim di en uffizi. La politichera da 60 onns era l'emprima dunna e l'emprima socialdemocrata en quest uffizi. Il suveran da Domat ha elgi l'emprima giada Baselgia ils 17 da zercladur 2007 sco successura da Peter Wettstein da la Partida liberaldemocratica (pld). Cunquai che ni la pld ni ils cristiandemocrats (pcd) ni la Partida populara svizra (pps) han gi da lezzas uras in candidat u ina candidata n'era l'elecziun da Baselgia nagina surpraisa. Las reelecziuns dals onns 2008 e 2012 ha ella dumagnà suveran e senz'avair gi remartgabels concurrenzes per il post. Cunquai è Beatrice Baselgia stada sur nov onns la presidenta sanestra entaifer ina vischnanca cun tant ina supranza burgaisa sco er cun in cussegl communal dominà da politichers burgais. Quai saja dentant betg stà in problem, schebain che la glieud guardava exact tge ch'ella faschevia a l'entschatta, sco ella di. Puncts impurtants da ses temp sco presidenta da Domat en stads il naufragi da la resgia gronda sin l'areal d'industria Vial Tului a Domat, la bova da la Val Parghera, las discussiuns enturn la Via Nova chantunala che maina atras il vitg sco era la creschienscha da la populaziun en general. La politichera ch'è gia dapi totalmain sur 20 onns deputada en il cussegl grond dal chantun Grischun, è uss ledà da pudair s'orientar da nov. Sch'ella candidescha per in'ulteriura perioda da legislatura a partir da l'onn 2018 en il Cussegl grond nun sa ella betg anc.